

**ՀՈՐՆ ՈՒ ՄՈՐԸ ԾԱԽՈՂ ՏՂԻ ՀԵՔԻԱԹԸ / Հայ ժողովրդական հեքիաթներ, Հատոր VIII /  
Գուգարք (Լոռի), Լոռու բարբառ (խոսվածք)**

Ժամանակով մի քաղաքում մի քյասիբ մարդ ա ըլում, ունենում ա մի տղա: Տղին տալիս ա ուսումնարան: Դա գնում ա ըտի կարդում է, իրան ուսումը ավարտում ա, գալի տուն: Հերն ասում ա.— Հըլե չվել չալիշ էկա, որ դու ուսումդ սըվորեցիր, ըստիան եղը դու մեզ պետք ա պրհես:

Տղեն ասում ա.— Կըպըհես:

Մի քանի օրից եղը տղեն միտք ա անում, թե ինչ անեմ, որ դըրանց լավ պահեմ: Գնում ա քաղաքը ման գալի, դես-դեն՝ իրան խելքի կտրած մի բան չի գտնում:

Մի օր ասում ա.— Ապի՛, արի մենք քոչենք էս քաղաքիցը, գնանք ուրիշ թաքավորի քաղաք: Թե չէ՝ էս քաղաքը մի քյասիբ քաղաք ա, մենք կարալ չենք, որ ըստի ապրենք:

Հերն ասում ա.— Դու գիտես, որդի՛, ոնց որ լավն ա՝ հընե արա:

Այինօյին բան ու ման ունեին, ծախեցին ու վեկացան, դուս էլան էդ քաղաքիցը: Շատ գնացին, թե քիչ էդ աստված ա գիդում: Գնացին հասան մի թաքավորի քաղաք:

Տղեն ասավ.— Ապի ջա՛ն,— ասավ,— նանի ջա՛ն, էկեք ձեզ մի խելոք բան ասեմ, էս կտանեմ ձեզ էս թաքավորի վրա՝ ոնց որ ըլի, կըծախեմ, թե թանգ, թե էժան:

Հերն ու մերը ասին.— Ա՛յ որդի, մենք հենց գիտացինք, թե մեզ պըհել պտիս: Բերել էս, որ էս քաղաքումը թաքավորի վրա ծախե՛ս:

Ասավ.— Ապի ջա՛ն, էս որ ձեզ պիելիս չի լեմ, կտանեմ ձեզ մի բեվեճ մարդի վրա կծախեմ, ամա ձեզ հենց օքմու տալիս եմ, որ ոչ սոված կենաք, ոչ տկլոր ու բոբիկ:

Ասավ.— Եփոր ծախում էս մեզ, սոված էլ կըլինք, բոբիկ էլ:

Տղեն ասավ.— Ա՛յ, խելքներուդ էդդար ա: Թաքավորը հենց մարդ ա, որ իրան դուլլուդ անող մարդուն յա բոբիկ պիի, յա սոված պըհի՞: Էկեք դուք ինձ լսեցեք, գնացեք ըտի, թաքավորի հացը կերեք ու կացեք, էս էլ կերթամ միչումը ման կգամ, մի բան կըճարեմ, ձեզ ըտի թողուլ չեմ, կգամ թաքավորի հարկը կտամ ու ձեզ կտանեմ:

— Դե դու գիտես, որդի՛, ոնց որ գիտես լավն ա՝ ընենց արա:

— Դե դուք ըստի կացեք, էս գնամ թաքավորի կուշտը:

Գնաց, գլուխ էրետ թաքավորին, կագնեց:

Թաքավորն ասավ.—

Ի՞նչ դուլլուդ ունիս, ասա:

— Թաքավորն ապրած կենա,— ասավ,— էս մի ջահել հերնումեր ունիմ: Թե կառնես, արի առ, թանգ թե էժան, ոնց որ ուզես՝ ընենց էլ կտամ:

Թաքավորն ասավ.— Գնա՛ հլա բի տենամ հորդ ու մորդ:

Գնաց ու էբեր: Մտիկ արավ թաքավորը, տեհավ, որ լավն են, իրանց կարան դուլլուդ անեն:

— Ասա՛,— ասավ,— ա՛յ տղա ինչ էս ուզում, ինչ որ ուզես՝ տալ պտիմ:

Տղեն ասավ.— Թաքավորն ապրած կենա, շատ չեմ ուզիլ, մորս կտաս մի ձեռք շոր, ինչ թավուր էս կուզեմ, հորս էլ կտաս մի լավ ձի, հարիր մանեթ էլ փող կբախշես ինձ:

Նազըրին կանչեց թաքավորը, ասավ.— Էս տղին տարեք դարգու կուշտը, ինչ թավուր շոր որ կուզի, ասեք՝ կարի տա դրան:

Գնաց, ինչթավուր որ շոր ուզեց՝ կարեց, էրետ իրան: Վի կացան, էկան: Տարավ թավլեն, ասավ.— Ո՛ր ձին ուզում էս՝ վեկալ:

Մի լավ ձի ջոկեց, քաշեց դուրս էրեր: Թաքավորն էլ հարուր մանեթ փող բախշեց իրան: Բարեխաթեն արավ հորն ու մորը հետ, գլուխ էրետ թաքավորին ու ձին քշեց, գնաց: Գնաց, ճամփումը տեհավ մի թաքավորի տղա ա գալի:

— Բարի աջողո՛ւմ,— ասավ թաքավորի տղեն:

Ասավ.— Աստու բարին քի՛:

— Ա՛յ մարդ,— ասավ,— ո՞րդի ես գնում:

Ասավ.— Թաքավորի տղա՛, ես գնում եմ, էն ֆըլան թաքավորի ախշիկը ուզիլ պտիմ:

Ասավ.— Շատ լավ պտես անի, ես է՛ն թաքավորի տղեն եմ. արի քեզ մի թուղթ տամ, թե՛ է՛ս ճամփումը եղ տղին տեհել եմ ու հըվանել եմ, թե իրիկունը գա, թե ռավոտը գա իմ քիրը որ ուզի՝ էլ չէ չասեք, տալ պըտեք:

— Շա՛տ լավ կանես,— ասավ,— թաքավորի տղա, որ ըտենց թուղթ տաս:

Էբեր ու մի թուղթ գրեց, էրետ էն տղին, էդիր գդակի ծալումը ու գնաց:

Գնաց մի դգում շատ ծըրավեց, տեհավ ճամփի դրաղին մի ջրհոր կա: Ձիուցը վեր էկավ, որ էն ջրհորիցը ջուր խմի, կռացավ, որ ջուր խմի՝ գդակի ծալիցը թուղթն ընկավ ջուրը: Թուղթը բաց արավ, տեհավ թե գրած ա. «Բիգունը գա՛ րիգունը, ռավոտը գա՛ ռավոտը էս մարդի գլուխը կտրեցեք»: Թուղթը պատռոտեց ու դեն ածավ: Ճամփա ընկավ գնաց: Գնաց էդ թաքավորի քաղաքումը մի պառավի տան դոնաղ ընկավ, էն քշերը պառավի կշտին կացավ: Պըռավին հըրցուց, թե.— Էս ձեր թաքավորի ախշիկը ի՞նչ թավուր ախշիկ ա:

Պառավն ասավ.— Ա՛յ որդի, ի՞նչ ես անում թաքավորի ախշիկը:

— Դեղի՛,— ասավ,— էկել եմ, որ էդ ախշիկը ուզիլ պտիմ:

Պառավն ասավ.— Ա՛յ որդի, հեռու կաց էդ ախշկանիցը: Էդ ախշիկը հարըրից մի ջան պակաս գլուխը կտրել ա:

Հարցրուց թե.— Խի՞ ա կտրել:

Պառավն ասավ.— Իրեք խոսք ունի, ասում ա՝ ով որ գտնի, պետք է նրան ուզեմ, որ գտնի ոչ՝ գլուխը պետք ա կտրեմ:

Ասավ.— Կտրում ա, թող կտրի, ես պետք ա գնամ ուզեմ դրան, տենամ ինչ թավուր խոսք պտի ասի, որ ես կարալ չպտիմ գտնուլ:

Ռավոտը տղեն վի կացավ, գնաց թաքավորի ախշկա կուշտը:

— Բարի լիս քի՛,— ասավ,— խանո՛ւմ:

— Աստու բարին քի՛, բարով էկար, համեցեք ըստի:

Նստեց: Ախշիկն ասավ.— Ասա՛ տենամ, դուլլուդդ ի՞նչ ա:

Ասավ.— Թաքավորի ախշի՛կ, էկել եմ քեզ ուզելու:

— Ա՛յ տղա, դու գիտես ո՞չ, որ ես իրեք խոսք ունեմ, էն խոսքերը չվել գտնեն ոչ՝ ինձ կարալ չեն ուզի:

Ասավ.— Ասա՛, թաքավորի ախշիկ, էն խոսկերքը, տենա՛նք:

Ասավ.— Շատ եմ ասել, գտել չեն, ամենի գլուխն էլ կտրել եմ, հարըրից մի ջան պակաս ա:

— Վնաս չունի՛,— ասավ,— թաքավորի ախշի՛կ, եթե գտնեմ ոչ՝ իմ գլուխն էլ կտրի:

— Աչքի՛ս վրա,— ասավ,— կասե՛մ:

Տղեն ասավ.— Թաքավորի ախշիկ, դուն իրեքը պտես ասի, ես էլ մինը պտեմ ասի: Թե ես քու իրեք խոսքը գտնում ոչ իմ գլուխը կտրի, որ դո՛ւ իմ մի խոսքը գտնուս ոչ...

— Դո՛ւ իմ գլուխը կտրի,— ասավ ախշիկը:

Տղեն ասավ.— Շա՛տ լավ:

Ախշիկն ասավ.— Դե գնա, ռավոտն արի՛ ասեմ:

Գնաց, ռավոտը տղեն էկավ, ասավ.— Թաքավորի ախշիկ, դե ասա տենամ:

Թաքավորի ախչիկն ասավ.— Աշխարքիս էրեսին ի՞նչն ա շատ թեթև:

Տղեն ասավ, թե.— Բսանի խելքի պես թեթև բան չկա:

— Դուզ,— ասավ,— էդ ա:

— Դե՛,— ասավ,— էն մինն էլ ասա:

Ասավ.— Չէ՛, գնա, ռավոտն արի, էն մինն էլ ընդով կասեմ:

Գնաց, ռավոտն էկավ:

Ախչիկն ասավ.— Աշխարքիս էրեսին ի՞նչն ա շատ ծանդր:

— Ա՛յ,— ասավ,— իսանի խելքի պես աշխարքի էրեսին ծանդր բան չկա:

— Էդ ո՞նց ա,— ասում է ախչիկը,— որ մի իսանը համ ծանդր խելք ունի, համ թեթև:

— Ըտենց չէ՛, թաքավորի ախչիկ, աշխարհում մի իսան չկա, էրկու իսան ա. մինը կա, որ շատ թեթև խելք ունի, մինը կա, որ Լավարու սարերը քաշում ա խելքով:

— Ապրե՛ս,— ասավ,— ա՛յ տղա, դրուստ ըտոնք են:

— Դե,— ասավ,— ասա էն մինն էլ:

— Գնա՛,— ասավ,— էգուց կըգաս, կասեմ էն մինն էլ:

Տղեն գնաց, ռավոտը լիսացավ, էկավ:

— Ասա՛,— ասավ,— թաքավորի ախչիկ, դե՛:

Ասավ.— Ա՛յ տղա, աշխարքիս էրեսին ի՞նչն ա շատ եգին:

— Թաքավորի ախչիկ,— ասավ,— էն մարդի խելքը որ թեթև ա, նա կասի՝ աչքն ա եգին, ո՛ր մարդի խելքը շատ ծանդրն ա, նա կասի՝ միտքն ա եգին: Ա՛յ ըստի նըստած ենք, համա, միտքս սաղ աշխարքում ման էկավ, էլի էկավ ըստի:

Ախչիկն ասավ.— Դո՛չադ տղա, ազատեցիր գլուխդ: Դե ասա քու մի խոսքդ, տենանք ի՞նչ ա:

Տղեն ասավ.— Չէ՛, ռավոտը կգամ, կասեմ:

Տղեն գնաց ու ռավոտն էկավ:

— Դե՛,— ասավ,— ասա՛, այ տղա:

— Թաքավորի ախչիկ,— ասավ,— էն ի՞նչ մարդ էր, որ մորը հաքավ, հորը վեր էլավ, կռացավ, որ ջուր խմի՝ իրան մահն ընկավ աղաքը:

Թաքավորի ախչիկը մնաց ըրմացած:

Խելքը մի բան չի կտրեց:

Ասավ.— Ա՛յ տղա, գնա ռավոտը կգաս, քեզ մի պատասխան կտամ:

Տղեն գնաց: Ախչիկը շատ մտքի եղնա ընկավ, տեհավ, որ դա գտնելու բան չի: Ասավ. «Ես որ մի ուստութիւն չանեմ, էդ տղեն ռավոտը իմ գլուխը տալ պտի»:

Վե կացավ, շորերը փոխեց, օխտն ախչիկ գլխին հըլվաքեց, առավ գնաց էն տղի կուշտը: Գնաց, իրար հետ հաց կերան, էդ տղին հարփացրուց, ախչկերանցը ճամփու էրետ, գնացին, ինքը մնաց կշտին, եղնեն ընկավ, հարփած մարդ էր, հարցրուց, թե. «Թաքավորի ախչկան ի՞նչ ես ասել, որ ըտենց նեղն ես գցել»:

Հարփած էր, գլխի չընկավ, ասավ.— Ես եմ, որ մորս ծախեցի՝ շորի տվի, հորս էլ ծախեցի՝ ձիու տվի, վեր էլա, էկա մի տղի ռաստ էկա, մի գիր տվեց, դրի գդակիս ծալումը, էկա, կռացա, որ ջուր խմեմ, վեր ընկավ՝ ընկավ ջուրը, վի կալա կարդացի, տեհա, որ գրել ա, թե. «Բիգունը գա՛ քիգունը, ռավոտը գա՛ ռավոտը կտրեցեք էդ տղի գլուխը» . վեկալա պատռեցի:

Ախչիկն էդ բաներն իմացավ, տղին խափեց ու դուրս էլավ, փախավ գնաց իրան տունը:

Տղեն ռավոտը վի կացավ, տեհավ, որ իրան խափել են, հարփացրել են ու էդ բաները իմացել, մտքի եղնան ընկավ ու մոլորվեց: Բալիշը վի կալավ, որ դնի ընդի, տեհավ ախչկա փոխանը բալըշի տակին, «Ջա՛ն,— ասավ,— պրծա»:

Վի կալավ ու էդիր ծոցումը ու գնաց թաքավորի ախշկա կուշտը: Ախշիկը չգիտեր, թե փոխանը մնացել ա: Հացկերույթ սարքեց ու շատ օքմին հավաքեց, որ տղի գլուխը կտրել տա: Տեհավ տղեն էկավ, ուրախուրախ նստեց, ասավ.— Թաքավորի ախշիկ, գտա՞ր:

— Հա՛, գտա:

— Ի՞նչ ա, որ գտար:

— Էն դուն ես, որ մորդ ծախել ես՝ շորի տվե, հորդ էլ ծախել ես՝ ձիու տվե:

— Դրուստ ա,— ասավ,— ի՞նչ ես ուզում հմի անես:

— Էս սեպի զլուխդ կտրիլ պտիմ տա:

— Փեշքա՛շ ա, թաքավորի ախշիկ, դեհ մի բան ասեմ, ու կտրիլ տու: Ես քշերս մի հավ էփեցի, դրի դաքիս, որ ուտեմ, ինքը թռավ, փախավ, փետուրը մնաց ձեռիս: Թե հավատում չեք՝ ա՛յ փետուրը,— ասավ ու ձեռը տարավ ծոցը, որ փոխանը հանի, ախշիկը տեհավ, ձեռիցը խլեց, թե՛ էլ շանց մի տալ, հրվատացինք, ինձ էս տղի հետ պսակեցեք:

Էն սրեհաթն էվեթ թաքավորը գունա-դիոլ էբեր, տարավ պսակը ժամը՝ օխտն օր, օխտը քշեր հըրսանիք արավ, հասցրուց իրանց մուրազին, դուք էլ հասնեք ձեր մուրազին:

Էդ տղեն թաքավորի աչքին հենց դիր էկավ, որ կես թաքավորությունը բախշեց, կես թաքավորութենի՛ հող, կես թաքավորութենի՛ էլ դոշուն:

Տղեն վի կացավ մի օր կնկանն ասավ.— Ես հերն ու մեր ունեմ ծախված, գնամ ազատեմ, բերեմ:

Գնաց էն թաքավորի կուշտը:

— Թաքավորն ապրած կենա,— ասավ,— խնդրում եմ, որ իմ հերն ու մերը ինձ տաս, լավ բոլ քեզ ծառայութին արին, ա՛ն քու հարիւր մանեթը, էս էլ քու ձին, էս էլ քու շորերի հախը:

— Դե տար, որդի՛,— ասեց թաքավորը:

Վի կալավ հորն ու մորը, էբեր իրան տուն, ասավ.— Բա որ ասում էի, թե ձեզ կպըհեմ, տեհա՞ք, որ հըմի կպըհեմ:

Բարին ըստի, չարին ընդի: Աստծանե իրեք խնձոր վեր գա. մինը՝ ասողին, մինը՝ լսողին, մինն էլ ալամ աշխարքին: